

四庫全書

子部

欽定四庫全書

古今事文類聚前集卷二十六

宋 祝穆 撰

仕進部

士子科目

羣書要語古者天子之制諸侯歲獻貢士於天子天子  
試之於射宮射義古之取士考素行之原詢鄉曲之譽崇  
禮遜明節義以朴厚為先雕文為後方今舉士明詔方

下固已驅馳府寺之廷出入王公之道陳篇希恩奏記

誓報故俗號舉人皆稱覓舉

唐薛登疏

操數寸之管書盈尺

之紙高可以釣爵位若循次而進亦不失於甲科

韓答實書

士人應敵文章多用他人議論時語曰問即不知用則

不錯

墨客揮犀

古今事實

周取士制

大司徒之職以鄉三物教萬民而賓興

地官鄉大夫之職

各掌其鄉之政教禁令正月之吉受教法于司徒退而  
頒之于其鄉吏使各以教其所治以攷其德行察其道  
藝三年則大比攷其德行道藝而興賢者能者鄉老及  
鄉大夫帥其吏與其衆寡以禮賓之厥明鄉老及鄉大  
夫羣吏獻賢能之書于王王再拜受之登于天府同命  
鄉論秀士升之司徒曰選士司徒論選士之秀者而升  
之學曰俊士升于司徒者不征于鄉升于學者不征于

司徒曰造士

王制

漢取士制

高祖詔曰賢士大夫既與我定有天下而不與吾共安  
利之可乎有肯從我遊者吾能尊顯之以布告天下其  
有稱明德者御史中執法郡守必身勸為之駕遣詣丞  
相府武帝詔曰召吏人有明當世之務習先聖之術者  
縣次續食令與計偕今至闔郡不薦一人其與中二千  
石禮官博士議不舉者罪有司議曰不舉士一則黜爵  
再則黜地三則黜爵削地畢矣

漢之射策

漢射策與對策不同按蕭望之傳射謂為難問疑義書於策量其大小署為甲乙之科不使彰顯射者隨其所得而釋之對者顯問以政事經義觀其所對文詞定高

下

孔氏  
雜說

北齊取士

北齊選舉多沿後魏之制皇帝出坐於朝堂中楹其有

濫劣者飲墨水一升文理孟浪者奪席脫容刀

通典

唐取士制

唐貢士之科有秀才有明經有進士有明法有書有算  
每歲仲冬郡縣館監課試其成者長史會屬僚設賓主  
陳俎豆備管弦牲用少牢行鄉飲酒禮歌鹿鳴之詩召  
耆艾叙少長而觀焉既餞而與計偕其不在館學而舉  
者謂之鄉貢武德以來禮部閱試之日皆嚴設兵衛薦  
棘闌之搜索衣服譏訶出入以防假濫焉

通典

中書詳覆

長慶三年正月禮部侍郎王起奏曰伏以禮部放榜之後遠近誤傳非便臣請今年進士堪及第者本司考試訖其詩賦先進中書門下詳覆勅却下本司然後准例大字放榜從之

殿試之始

則天永昌元年二月策問貢舉人於洛陽城殿前殿試自此始

糊名之始

武后以吏部選人多不實乃令試日自糊其名暗考以定等第

重進士科

進士科始隋大中盛貞觀永徽之際縉紳雖位極人臣不由進士者不以為美其推重謂之白衣卿相以白衣之士即卿相之資也重之如此

並通典

不許繼燭

唐制禮部試舉人夜以三鼓為限宋率用白晝不許繼

燭國朝  
事實

舉業疎畧

宋初每歲放榜取士極少方安德裕作魁日九人而已  
蓋天下未混一也至太宗朝浸多所得東南之秀其後  
又別立分數考校五路舉人以北人拙於詞令故優取  
熙寧二年廷試罷三題專以策取士非雜犯不復黜然  
五路舉人尤為疎畧黃道夫榜傳臚至第四甲党縛卷  
子神宗大笑曰此人何由過省知舉舒信道對以五路

人用分數末名過省上命降作第五甲末自後人日益  
廣宣和七年沈元用榜正奏名殿試至八百五人蓋燕  
雲免省者既衆天下赴南宮試者萬人無踰此歲之盛

推原事始

開寶六年因徐士廉伐鼓訟不公帝御講武殿覆試御  
試自此始 賜詩自興國二年呂蒙正榜始 分甲次  
自興國八年王世則榜始 及第日賜袍笏自祥符中  
姚曄榜始 賜宴自呂蒙正榜始 賜同進士出身自

王世則榜始 唱名自雍熙二年梁顥榜始 封彌謄  
錄覆考編排皆始於祥符景德之間

隔截進士

陳彭年任翰林學士求對歸詣政府王文正公旦延見  
之陳起呈其狀曰科場條貫公投之於地曰內翰做官  
幾日待隔截天下進士陳惶懼而退

遺事

秀才變學究

王荊公改科舉暮年曰本欲變學究為秀才不謂變秀

才為學究蓋舉子專誦王氏章句而不解義正如學究

誦註疏耳

談叢

廷試以策

呂公著知貢舉密奏曰天子臨軒策士而用詩賦非舉賢良求治之意今來廷試乞出自宸衷唯以詔策咨訪

治道自是上臨軒始以策試進士

呂家傳

不私增年

寇萊公十九舉進士時太宗取人多問其年年少者往

往罷遣或教公增其年公曰吾初進取可欺君耶

不妨舉業

程伊川曰或謂科舉事業奪人之功是不然且一月之中十日為舉業餘日足可為學然人不志於此必志於彼故科舉之事不患相妨惟患奪志

外志

古今文集

雜著

學校貢舉私議

朱元晦

古者學校選舉之法始於鄉黨而達於國都教之以德行道藝而興其賢者能者蓋其所以居之者無異處所以官之者無異術所以取之者無異路是以士有定志而無外慕蚤夜孜孜惟懼德業之不修而不憂爵祿之未至夫子所謂言寡尤行寡悔祿在其中孟子所謂修其天爵而人爵從之蓋謂此也今之為法其所以教者既不本於德行之實而所謂藝者又皆無用之空言至於其弊則所謂空言者又皆恠妄無稽而適以敗壞學

者之心志是以人才日衰風俗日薄朝廷州縣每有一  
事之可疑則公卿大夫官人百吏愕眙相顧而不知所  
出是亦可驗其為教之得失矣議者不知其病源所在  
反以程試文字之不工為患夫空言本非所以教人亦  
不足以取士而詩賦又空言之尤者其無益設教取士  
章章明矣然熙寧罷之而議者不以為是者非罷詩賦  
之不善乃專主王氏經義之不善也今必罷詩賦而分  
諸經子史時務之大者古者大學之教以格物致知為

先而具考教之法又以九年知慮通達強立不反為大成蓋天下之事皆學者所當知而其理之載於經者則各有所主若諸子之學同出於聖人各有所長不能無短其長者固可以不學而其所短亦不可不辨也至於諸史則該古今興亡治亂得失之辨時務之大者如禮樂制度如天文地理兵謀刑法之屬亦皆當世所須而不可闕皆不可以不知習也今欲以易書詩為一科而子年午年試之周禮儀禮及二戴之禮為一科而卯

年試之春秋三傳為一科而酉年試之諸經皆兼大學  
論語中庸孟子論則分諸子為四科而分年以附焉  
策則諸史時務亦然則士無不通之經無不習之史而  
皆可為當世之用矣草茅之慮偶及於此故嘗敢私記  
其說以為當路之君子或將有取焉

摹印進士試題

唐穆宗長慶元年禮部侍郎錢徽知舉放進士鄭朗等  
三十三人後以段文昌言其不公詔中書舍人王起知

制誥白居易重試駁放盧公亮等十人貶徽江州刺史  
白公集有奏狀論此事大畧云伏自科目欲重進士以來  
論奏者衆甚蓋以禮部試進士例用書策兼得通宵得  
通宵則思慮必周用書冊則文字不錯昨重試之日書冊  
不容一字大燭又許兩條迫促驚忙幸皆成就若比禮  
部所試事校不同及駁放公亮等敕文以為孤竹管賦  
出於周禮正經閱其程試之文多是不知本末乃知唐  
試進士許挾書及見燭如此國朝淳化三年太宗試進

士出卮言日出賦題孫何等不知所出相率扣殿檻乞  
上指示之上為陳大義景德二年御試天道猶張弓賦  
後禮部貢院言近年進士惟鈔畧古今文賦懷挾入試  
昨者御試以正經命題多憫所出則知題目不示以出  
處也大中祥符元年試禮部進士內出清明象天賦等  
題仍錄題解摹印以示之至景祐元年始詔試日進士  
題目具經史所出摹印給之更不許上請

容齋  
隨筆

### 古詩

送皇甫湜赴舉

馬異

馬蹄聲特特去入天子國借問去是誰秀才皇甫湜含  
吐一腹文八音兼五色主文有崔李郁郁為朝德青銅  
鏡必明朱絲繩必直稱意太平年念子長相憶

律詩

省試夜

薛能

白蓮千朵照廊明一片承平雅頌聲更報第三條燭盡  
文昌風景寫難成

題都堂壁

韋承矩

褒衣博帶滿塵埃獨上都堂納卷回蓬巷幾時聞吉語  
棘籬何日免重來三條燭盡鐘初動九轉丹成鼎未開  
殘月漸低人擾擾不知誰是謫仙才

詩話

八叉手成

溫庭筠才思艷麗工於小賦每入試押官韻凡八叉手  
而八韻成多為隣鋪假手日救數人而士行有缺縉紳

薄之

槐黃赴舉

長安舉子六月後落第者不出京謂之過夏借淨坊廟  
院作文章曰夏課時語曰槐花黃舉子忙故翁承贊有  
詩云雨中粧點望中黃勾引蟬聲送夕陽憶得當年隨  
計吏馬蹄終日為君忙

高談性命

山谷詩云棘闈深鎖武成宮談天進士雕虛空熙豐間

進士高談性命溺於虛無元祐初其習猶在

狀元

羣書要語子大夫裒然為舉首

漢制策

北斗星魁為首杓

為末

天文志

昔者處貧賤之辱所有無以異於今一朝居

豪傑之先而人然後知其貴

坡集

擢冠倫魁

益公集

三年而

奉詔策固南宮進士之所同一舉而冠儒科蓋東閣郎

君之未有

汪藻賀秦相

古今事實

晁董公孫

見制科門

謝傳衣鉢

詳見主司門

唐進士自狀元以下到主司宅下馬綴行而立斂名紙

通呈對拜主司云謝衣鉢

撫言

狀元角勝

太祖朝王嗣宗與趙昌言爭狀元於殿前乃命二人手搏約勝者與之趙昌言髮禿嗣宗毆其幞頭墜地趨前

曰臣勝矣上笑以嗣宗為狀元

涑水記聞

五年不詔

太宗自淳化三年賜進士孫何及第出身後五年不降詔

大小狀元

章聖即位咸平元年二年皆放進士舉孫僅孫暨相繼魁天下皆汝州人京師閭巷之人榮之至於百姓亦以大狀元小狀元呼之嘉祐八年許將治平四年許世安時謂大許小許然亦以姓呼蓋由隔彭汝礪一榜也

呼小狀元

孫何孫僅兄弟馳名王黃州覽僅文編書其後曰明年再就堯堦試應被人呼小狀元僅果第一王黃州以詩寄之曰病中何事忽開顏記得時稱小狀元粉壁每題龍虎榜錦標終屬鵲鴿原

澠水燕談

小宋當魁

宋祁兄弟同行逢一異僧相曰小宋當大魁天下大宋亦不失甲第後十年大宋復遇諸塗僧乃大驚曰公丰

神特異如此豈活數萬命者乎大宋曰素貧安得有此  
僧曰姑思之宋良久曰北堂有蟻穴忽為大雨所浸編  
竹為橋以渡豈此是耶僧曰必是也小宋合當首魁公  
終不出其下比唱第小宋果大魁章獻太后乃謂弟不  
可以先兄因命大宋為第一小宋為第十

竟如素志

胡旦有俊才尚氣凌物嘗大言曰應舉不作狀元仕官  
不為宰相乃虛生也及隨計之秋適坐中聞鴈乃題詩

曰明年春色裏領取一行歸果魁天下

鄙渴睡漢

呂文穆公未第時薄遊一縣時胡大監旦隨其父宰是邑遇呂甚薄客有喻胡曰呂公能詩宜少加禮胡問警曰客舉曰挑盡寒燈不成夢胡笑曰乃一渴睡漢耳呂甚恨而去明年首中甲科寄聲於胡曰渴睡漢狀元及第矣胡曰待我明年第一人及第輸君一籌既而次榜亦中首選文穆公蒙正也

歸田錄

不在溫飽

王曾青州發解及南省廷試皆為首冠中山劉子儀為翰林學士戲語之曰狀元試三場一生喫著不盡沂公正色答曰曾平生之志不在溫飽

東軒筆錄

不受郊迎

王沂公曾狀元及第還青州故郡府帥聞其歸乃命父老娼樂迎於郊公乃易服乘小驢由他門入遂謁守守驚曰聞君來已遣人奉迎門司未報君至何為抵此公

以實告之曰不才幸忝科第敢煩大守父老致迓是重

其過也

吳曾漫錄

五色雲見

天聖五年仁宗試進士韓魏公名在第二時唱名第一

甲方終太史奏曰五色雲見從官皆賀

魏公家語

兩世狀元

真宗東封六月放梁固以下進士及第社后土于汾陰  
放張師德以下進士及第固狀元梁顥子師德亦狀元

去華子魏野以詩賀曰封禪汾陽連歲榜狀元俱是狀元兒

三世探花

李昌武宗諤之子昭邁十八歲鎖廳及第昭邁子杲卿杲卿子士廉皆不逾是歲登甲科凡三世俱曾為探花郎亦衣冠盛事也

揮麈錄

傳呼狀元

蔡齊字子思真宗臨軒策士夜夢殿下有菜一苗甚盛

與殿基相高及拆第一卷蔡齊上見其狀堂堂曰得人  
矣詔金吾給衛士七人清道尋詔自今第一人及第令  
給七人當直許出入則兩對引喝傳呼狀元始於此也

東齊  
遺事

### 叱呼狀元

韓持國知潁州府時彥以狀元及第每稱狀元持國怒  
曰狀元無官耶自此呼時僉判彥終身銜之馬涓巨濟  
亦以狀元及第為秦簽亦呼狀元秦帥呂晉伯曰狀元

者及第未除也既為判官不可曰狀元巨濟媿謝

同上

語以不欺

賈內翰黜以狀元及第歸鄧州范文正公為守內翰謁文正曰某晚生偶得科第願受教文正曰君不憂不顯惟不欺二字可終身行之內翰拜其言不忘

聞見錄

願得忠孝

神宗慎於選士皇祐五年廷試進士考定前一日取首選卷焚香祝之曰願得忠孝狀元洎唱名乃鄭內相獬

也故鄭謝及第啓云何以副上心忠孝之求是也

史塵

### 少年大魁

李文正公嘗言同年相國王公溥二十六歲狀元後六年拜相時年三十二又四年加司空時年三十六又六年以一品罷相守太子太保時四十二歸班行猶在具慶下每先太傅見客公以前宰相兢兢侍側畧無惰容客以不安席引去者甚衆當時縉紳之士無不以為美

談

李文正  
談錄

先衣新衣

王拱辰與歐公同年進士文忠自監元省元赴廷試銳  
意魁天下明日當唱名備新衣一襲拱辰輒先衣以入  
文忠恠焉拱辰笑曰為狀元者當衣此唱名果第一

邵氏

後錄

以文頒示

蔡疑文饒崇寧五年廷試第一上甚喜其文以御寶封  
試卷付國子監頒示四方俄召對

不肯自陳

范鎮舉進士禮部奏名第一故事殿庭唱第過三人則禮部第一人者必越次抗聲自陳因擢寘上第鎮不肯自言至第七十九人乃出拜退就列無一言廷中皆異之

不娶貴戚

馮京舉進士自鄉選至廷對俱策名第一張堯佐倚外戚欲妻以女使擁入其家頃之中人以酒斂至且示以

奩具甚厚京不肯就力辭之

天門放榜

見天門

夢斫落頭

相國劉沆天聖中赴省試一夕夢被人斫落頭心甚惡

之有鄉人釋之曰狀元不到十二郎做公第只得第二

人公詰之曰斫却頭留項在裏蓋南音呼沆為項也後

果第二人及第

青箱雜記

夢火山軍

見主司門

夢人剃髭

李文定公迪美髭髯御試前一日夢被人剃削俱盡心惡之有解者曰必為狀元緣今歲省元是劉滋已替滋矣非狀元而何是歲果狀元及第

皇朝類苑

夢登雲梯

莆田鄭僑惠叔乾道己丑春省試中選未廷對夢空中一梯雲氣圍繞竊自念曰世所謂雲梯者茲其是歟俄身至雲梯側遂登之及高層仰望則有大石蒼然如鏡

面正懼壓已忽冉冉昇騰立於石上驚覺自喜但不曉  
登石之義既而為天下第一其次曰溫陵石起宗先是  
考官用分數編排石君當居上臨唱名始易之云

容齋  
隨筆

### 古今文集

### 雜著

狀元年三十以下者

王宣徽

拱辰

汪端明

應辰

年十八沈內翰

邁

年二十莫內翰

傳

二十二梁內翰

顥

張舍人

孝祥

王尚書

佐

皆二十三楊

樞密蘇參政

簡易

木尚書

待問

皆二十四王丞相

曾

王參政

堯臣

張監丞

唐卿

賈內翰

黠

彭尚書

汝礪

衛舍人

湮

皆二十五

何僕射

趙丞相

汝愚

皆二十七蔡樞密

齊

宋丞相

庠

馮

樞使

京

楊監丞

寘

姚祕書

穎

王叔興

昂

皆二十九陳樞

相

克叟

張參政

觀

詹舍人

駢

許簽判

奕

皆年三十

朝野

雜記

狀元十年執政者

呂許公

蒙正

丁丑榜癸未年參政凡七年董資政

德元

丁卯

榜甲戌年參政凡八年鄭梁公

克家

庚辰榜己丑年簽書

凡十年

狀元五年持橐者

余給事

梟

自及第至給事中凡二年蘇參政

易簡

霍侍郎

端友

自及第至知制誥凡四年陳英公

堯咨

自及第至知制

誥凡五年

狀元三年執政省元二年持橐者

秦伯陽紹興十二年以右通直郎登第二年而為禮部侍郎三年而知樞密院事其子塤紹興二十四年登第

明年為禮部侍郎古今所未有也

狀元大拜者

建隆以來狀元已沒者六十九人而大拜者七人而已

呂文穆

蒙正

王文正

曾

李文定

迪

宋元憲

庠

何開府

鼎

梁

文靖

克家

趙銀青

汝愚

是也執政凡十一人楊樞密

礪

王景

莊

嗣宗

蘇參政

易簡

陳文忠

堯叟

張文孝

觀

蔡文忠

齊

王文忠

堯

臣

馮文簡

京

許黃門

將

陳樞密

誠之

鄭樞密

僑

是也節度

使二人陳康肅

堯咨

王懿恪

拱辰

是也此外則何文鎮自登

第至大拜十二年梁鄭公登第至大拜十三年

並雜記

古詩

觀上親試貢士歌

王元之

天王出震靈宇清奎星燦燦照文明  
詔令郡國貢多士大張一網羅羣英  
聖情孜孜終不倦日斜猶御金鑾殿  
宮柳低垂三月煙爐香飛入千人硯  
麻衣皎皎光如雪一一重瞳親鑒別  
孤寒得路荷君恩聚首皆言盡臣節  
小臣蹤跡本塵泥登科曾賦御前題  
屈指方經五六歲

如今已上青雲梯位列諫官無一語自愧將何報明主  
應制非才但淚垂強作狂歌歌舜禹

律詩

登第後宿平康里

鄭谷

春來無處不間行  
楚國相看別有情  
好是五更殘酒醒  
耳邊聞喚狀元聲

詩話

平康謁妓

裴思謙狀元及第以紅牋作名紙謁平康里諸妓因宿  
于里中有詩曰銀缸斜背解鳴璫小女低聲喚玉郎從  
此不知蘭麝貴夜來新惹桂枝香

未第選壻

李翱尚書牧江淮郡日進士盧儲持卷來謁李禮待之  
置文卷几案間赴公宇視事長女及笄見文尋繹數四  
謂小青衣曰此人必為狀元李公聞之深異其語乃慕  
為壻來年果狀元及第纔過殿試徑成佳姻詩曰昔年

曾去玉京遊第一仙人許狀頭今日已成秦晉約果教  
鸞鳳下粧樓

志魁天下

黃冕仲未第時嘗有魁天下之志元豐四年南劍州譙  
門一柱忽為迅雷所擊冕仲聞之占成四句云風雷昨  
夜破枯株借問天公有意無莫是卧龍蹤迹困放開頭  
角入天衢次年對策為天下第一

身到黃扉

本朝狀頭入相者呂文穆蒙正王文正公曾李文定公  
迪宋元憲公庠元憲登庸知制誥石揚休賀以詩曰皇  
朝四十三龍首身到黃扉止四人副樞王伯庸堯臣曰  
何不道已四而特言止惜哉蓋伯庸繼元憲魁天下士  
然未幾薨於位自慶厯及今迄未有先多士而後大拜  
者異哉西清詩話後四十年李士美何文鎮亦以廷魁至鼎  
席渡江則梁克家揮麈錄

出處畧同

王沂公與李文定公連榜取殿魁又相繼秉鈞軸文定鎮并門公均逸本鄉作詩寄之畧曰錦標得雋曾相繼金鼎調元亦荐更井上兒童公再見會稽幢紱我偏榮

歸田錄

誓作狀元

呂文穆公蒙正嘗與溫恭蕭仲舒及一友人忘其姓名讀書於洛陽龍門山誓不作狀元不仕及唱第文穆為狀元溫恭已不意然尚中甲科其友人隨拂衣歸隱後

文穆大用太宗問與誰為友文穆即以歸隱者對遂以  
著作郎召不起故文穆罷相居洛作詩贈之曰昔作儒  
生謁貢闈今提相印出黃扉九重鴛鴦醉中別萬里煙  
霄達後歸隣叟盡垂新白髮故人猶著舊麻衣洛陽謾  
詫多才子自歎遭逢似我稀

青箱  
雜記

### 賦詩見志

夏文莊公守安陸宋莒公兄弟尚皆年少文莊異待之  
命作落花詩莒公曰漢臯珮冷臨江失金谷樓危到地

香子京曰將飛更作回風舞已落猶成半面粧是歲詔  
下兄弟皆應舉文莊曰詠落花而不言落大宋須狀元  
及第異日作宰相小宋非所及然亦須登嚴近後皆如  
其言故文莊在河陽聞呂公登庸以別紙賀曰昔年安  
陸已識台光蓋謂是也

青箱  
雜記

賦梅見志

見梅  
門

貢院失火

元豐八年尚書戶部侍郎權知貢舉開寶寺寓禮部貢


院夜四鼓火翟曼陳之方馬希孟皆焚死其後別試焦  
蹈為魁諺云不因南省火安得狀元焦

老作大魁

梁灝年八十二雍熙十年狀元及第謝啓曰白首窮經  
少伏生之八歲青雲得路多太公之二年後至祕監卒

年九十餘

陳遜齋  
間覽



古今事文類聚前集卷二十六

# 欽定四庫全書

子部

古今事文類聚前集卷二十八

詳校官中書<sub>臣</sub>康綸鈞

侍讀<sub>臣</sub>孫球覆勘

總校官編修<sub>臣</sub>王燕緒

校對官編修<sub>臣</sub>吳裕德

謄錄監生<sub>臣</sub>湯師錫

欽定四庫全書

古今事文類聚前集卷二十七

宋 祝穆 撰

仕進部

制科

宏詞

館職附

羣書要語賢良明於古今正事之體受策察問咸以書

對著之於篇朕親覽焉

漢武帝

子大夫褒然為舉首

漢制

宏詞唐設博學宏詞科

選舉志

國初立宏詞拔萃科紹聖

立服勤詞學科大觀改詞學兼茂才科紹聖改博學宏

詞科

國史

古今事實

擢董仲舒

董仲舒字廣川武帝即位舉賢良文學之士前後百數而仲舒以賢良對策

擢晁錯

晁錯習中韓刑名於張恢武帝詔有司舉賢良文學士

錯在選中答策謂五帝神聖其臣莫及

擢公孫弘

武帝舉賢良文學之士對策者百餘人太常奏弘第居  
下天子擢弘為第一召見容貌甚嚴拜為博士待詔金  
馬門

或治申韓

建元中衛綰奏所舉賢良或治申商韓非蘇秦張儀之  
言亂國政皆罷奏可

桂林一枝

秦始中郤詵遷雍州刺史武帝於東堂會送問詵曰卿自以為何如詵對曰臣奉賢良對策為天下第一猶桂林之一枝崑山之片玉帝笑侍中奏免詵官帝曰吾與之戲耳

獨為第一

張柬之字孟將進士擢第以賢良召試同時對策者千餘人柬之獨為第一擢拜監察御史

無登等者

宋興以來御試制科舉人無登等者惟吳育第三等餘

皆四等除此則落之

東軒筆錄

直言不棄

嘉祐六年試賢良方正蘇軾第三等轍第四等轍語切  
直司馬光考入第三等翰林學士范鎮難之欲降其等  
考官胡宿欲黜之光言是獨有愛君憂國之心不可不  
收上曰求直言而以直棄之天下其謂我何乃收入第

四等

當取大科

富韓公弼初遊場屋穆脩伯長謂之曰進士不足以盡子之材當以大科名世公果禮部試下時太師公官耀州西歸陝范文正公遣人追公曰有旨以大科取士可亟還公復還京師見文正辭以未嘗為此學文正曰已聞諸君薦君矣久為君闢一室皆大科文字可往就館時晏元獻公為相求婚于文正文正曰公女若嫁官人

仲淹不敢知必欲國士無如富弼者元獻一見公大愛  
重之即議婚公遂以賢良方正登第

間見錄

一門大科

錢希白賢良方正擢第子明逸子飛彥遠子高相繼登  
制科蘇軾蘇轍兄弟同年制策八等衣冠以為盛事故  
子高謝啟曰兩朝之間相繼者父子十年之內並進者  
弟兄子瞻啟曰兄弟並竊於賢良衣冠或以為盛事希  
白從孫藻以皇祐五年登進士第是年說書中選後十

年復登制科其謝啟云十年二第屢玷於主司一門四

人無慙於祖烈

渑水燕談

預夢試題

吳文甫公奎將舉順良夢入魏文帝廟升殿問羣臣優

劣公未對帝曰韓延壽為最是夕門下抄書吏楊開者

亦夢公讀楊阜傳翼日告公公覽二傳及試六論一乃

韓延壽楊阜孰優公果中首選

渑水燕談

出孟子注

張賢良咸漢川人應茂科初出蜀過夔州郡將知名士也一見過之甚厚因問曰四科優劣之差見于何書張無以對守曰載孟子注中因掇示之張道中漫思索著論及至都閣試文論以此為首題張更不注思而就主文錢穆父覽之大喜過閣第一張即魏公之翁也

揮麈錄

不讀孟子

李泰伯素不喜孟子以為孔子尊王孟子教諸侯為王嘗試制科六論不得其一曰吾書未嘗不讀必孟子注

疏擲筆而出人為檢視之果然終不中第

辭類俳優

以下係  
宏詞

韓愈云僕間禮部有以博學宏詞選者人尤謂之才退  
因取所試讀之乃類于俳優者之辭顏怛怛而心不寧  
者數月

答崔立  
之書

不當自售

楊龜山云試宏詞乃是以文字自售古人為己似不如

此

語錄

問克敵弓

李平叔云洪景伯兄弟應博學宏詞以克敵弓銘為題  
洪惘然不知所出有巡舖老卒覩于案間以問洪曰官  
人欲知之否洪笑曰非而所知卒曰不然我本韓太尉  
世忠之部曲從軍日見有人以神臂弓舊樣獻于太尉  
太尉令如其制度製以進御賜名克敵并以歲月告之  
洪盡用其語首云紹興戊午五月大將云云主文大驚  
喜是歲遂中科目若有神助焉此蓋熙寧中西人李宏

中創造因內侍張若水獻于裕陵者也

倒綳孩兒

以下係館職

苗振第四人及第召試館職晏相曰宜稍溫習振曰豈有三十年為老娘而倒綳孩兒者乎既試果不中選公笑曰苗君竟倒綳孩兒矣

倦遊錄

召試謁謝

韓忠獻公宋景文公同召試中選王德用帶牛章事例當謝二公有空疎之謙德用曰亦曾見程文誠空疎少

年更宜廣問學二公大不堪景文至曰吾屬見一老衙  
官是納侮也後二公俱成大名德用已薨忠獻謂景文  
曰王公雖武人尚有前輩激勵成就後學之意不可忘  
也

聞見  
錄

古今文集

古詩

送韋道冲秀才赴制舉

劉禹錫

驚禽一辭巢栖息無少安秋扇一離手流塵蔽霜紈故

侶不可追涼風日已寒遠逢杜陵士別盡平生歡逐客  
無印綬楚江多芷蘭因君時暇遊長缺不復彈閱書南  
軒霽絙琴清夜闌萬境身外寂一盃腹中寬伊昔元宗  
朝冬卿冠鴛鸞肅穆升內殿從容頂高冠游夏無措詞  
陽秋垂不刊至今羣王府學者空縱觀世人希德門揭  
若攀峰巒之子尚明訓鏘如振琅玕一旦西上書班裳  
拂行鞍荆臺宿暮雨漢水浮春瀾君門起天中多士如  
星攢烟霞覆雙闕林舞羅千官清漏滴銅壺仙廚下雕

盤熒煌仰金榜錯落飛濡翰古來長策人所嘆遭時難  
一鳴從此始相望青雲端

莫相疑行

杜甫

男兒生無所成頭皓白齒牙搖落真可惜憶獻三賦蓬  
萊宮自怪一日聲烜赫集賢學士如城牆觀我落筆中  
書堂往時文彩動人主今日饑寒趨路傍晚將末節契  
年少當面論心背面笑寄謝悠悠世上兒莫爭好惡莫  
相疑

詩話

中貴乞詩

夏鄭公諫以父歿王事得三班差使攜所業投李文靖  
公沆有山勢蜂腰斷溪流燕尾分之句明日袖詩進呈  
乞換一文資後舉制科對策庭下有老宦者曰閱人多  
矣賢良他日必貴以吳綾手巾乞詩公題曰殿上袞衣  
明日月堦前旂影動龍蛇縱橫禮樂三千字獨對丹墀  
日未斜

試罷題壁

王仲至欽臣仁宗時名儒召試學士院王荆公為考官  
于簾下見其試畢就壁間題字荆公使人錄之乃一詩  
荆公為改奏罷長楊賦作奏賦長楊罷荆公在金陵好  
事者求書多寫此詩古木陰森白玉堂長年來此試文  
章日斜奏罷長楊賦間拂塵埃省畫牆

及第下第附

羣書要語其都會謂之舉場通稱謂之秀才投刺謂之

鄉貢得第謂之前進士互相推敬謂之先輩俱捷謂之同年列姓名於慈恩謂之題名在闕試謂闕燕大宴曲

江亭謂之曲江宴籍而入選謂之春官不捷而醉飽謂

之打盹燥

李肇國史補

士人初登第必展歡宴謂之燒尾說

者云虎化為人惟尾不化須得燒去乃化又說新羊入

羣羊抵觸須燒其尾乃走又說魚躍龍門化為龍時必

雷為燒其尾乃得化

間見錄

交州記有龍門水深百尋大

魚登此化成龍不得過曝腮點額血流此水常如丹池

又謂龍門今在絳州

李膺傳注

鵬搏扶搖而上者九萬里

莊子

今夫取科者交貴勢倚親戚合則插羽翮生風濤沛然而有餘吾無有也

柳送婁文

新進士每及第鄉曲親戚例以

聲樂相慶

天寶遺事

詩曰龍門客又新

杜甫

攀桂仰天高

變化有鵬鵬

蛟

龍得雲雨

鵬鷃在秋天

青雲動高興

勲業青冥

上勲業頻看鏡

白屋難久留

禮闈曾擢桂

致

身青雲上

新渥照乾坤

亨衢照紫泥

汀草隨青

袍 早充觀國賓

並杜折却月中桂李

風雲入壯懷韓振

衣造雲闕

漸階振羣鷺

雲霄今已逼韓

及第拜親

榮 恩袍草色動仙籍桂香浮

並唐人

下第二試於吏部一既得之而又黜於中書

韓答崔書

詩句氣味如中酒情懷似別人

唐詩人下

古今事實

芥拾青紫

漢夏侯勝為太子太傅每講授常謂諸生曰士病不明

經術經術苟明取青紫如俛拾地芥耳

糾不赴宴

唐進士會燕曲江崔彖請告假不赴乃以彫幘載妓遊  
觀為團司所發崔沆為主罰錄事判云深挽席帽密映  
羶車紫陌尋春便隔同年之面青雲得路可知異日之

心辨  
言

淡墨題榜

進士榜粘黃紙四張以淡墨羶筆書禮部貢院四字粘

於榜首

撫言

李紆侍郎放舉人命筆吏勒紙書榜末及填

禮部貢院字吏得疾令史王脉亦善書詔令終其事值

脉醉以氈筆染不加墨迨明方覺字體濃淡相間反致

其妍自後法之遂為故事

賈魏公談錄

### 題名鴈塔

唐進士自神龍以來杏園宴後皆於慈恩寺塔題名它

時有將相則朱書之或未及第時題名字添前進士

李肇

國史補佛在世時有比丘見羣鴈飛乃念曰此鴈可充我

之食佛曰此鴈王也不可輒食乃為營塔

曾說類

泥金書帖

唐進士及第以泥金書帖附家書中報登科之喜至文

宗朝遂罷此儀

虛氏雜記

龍虎榜

唐歐陽詹與韓愈李觀崔羣王涯聯第進士時號龍虎

榜

詹傳

探花郎

唐進士杏園初會謂之探花宴以少俊二人為探花使

遍遊名園若他人先折得名花則二人被罰洛中選最

年少者三人為探花使世謂之探花郎

東軒筆錄

榜花

唐大中以來禮部放榜有姓氏稀僻者號曰榜花南唐新書

一第溷子

唐元結舉進士禮部侍郎楊浚見其文曰一第溷子可有司得于是賴果擢上第

千佛名經

張倬數舉進士不第捧登科記頂上戴之曰此千佛名

經  
撫言

東塗西抹

薛逢晚年厄於官途策羸馬赴朝值新進士綴行而出  
團司所由數十人見逢行李蕭然前導曰回避新郎君  
逢驟然遣价語曰莫負相阿婆三五少年時也曾東塗

西抹來

撫言

袁州舉人

盧肇袁州人初赴舉先達曰袁州出舉人邪答曰袁州

舉人亦猶沅江出鼈甲九肋者稀

撫言

因弟撻兄

李景莊老於場屋每被黜母輒撻景讓

景莊兄

宰相謂主

司曰李景莊今歲不可不收可憐彼兄每歲受撻由是

始得及第

唐武宗紀

少年擢第

韓愈年二十五歲而擢第於春官以文名於四方與邢尚書

妓抓破腮

唐妓牙娘性輕率好傷人肌膚夏侯澤為牙娘批頰傷甚翼日期集澤厲聲曰昨日女子牙娘抓破澤腮同年

皆駭孫榮北里志

金榜通判

宋太祖幸西都張文定公齊賢獻十策帝歸謂太宗曰

吾西都為汝得一張齊賢宰相也太宗即位齊賢方赴  
廷試帝欲其居上甲有司置於丙科帝不悅有旨一榜  
盡除京官通判文定將作監丞通判衡州不十年位宰

相

聞見  
錄

更相為僕

見交  
友門

錫宴簪花

溫公曰吾性不喜華靡二十忝科名間喜宴獨不簪花

同年曰君賜不可違也乃簪一花

家傳

熟讀左傳

父穎少年赴鄉舉逆旅中遇一村儒狀極葺闢顧謂父  
曰君此行登第矣父曰賤子家於鄆無師友加之汶上  
少典籍今學疎援寡聊觀場屋耳儒者曰吾有書一卷  
以授君詰旦奉納翼日果持至乃左傳第十也謂父曰  
此卷書宜熟讀取富貴後四十年亦有人因此書登甲  
第科然齡祿俱不及君記之父頗為異時亦諷誦會李  
愚知舉試鑄鼎象物賦事在卷中一揮而就愚賞之擢

甲科後四十年當祥符五年御試此題徐奭為狀元父  
後以戶部侍郎致仕七十八薨徐四十為翰林學士卒  
渾水燕談

熟讀樂記

張客省退夫應舉時因醉乘驢過市誤觸倒雜賣擔子  
其人喧呼不已視擔中止有樂記疏一冊遂以五十金  
市之其人乃去張初不攜文字止閱所買樂記疏一冊  
無何省試出黃鐘為樂之末節論獨樂記為詳論擅場

遂高選明年擢甲科

倦游錄

殿試無黜

宋自太祖以來進士過省越殿試尚有被黜者遠方寒士殿試下貧不能歸多至失所有赴河而死者仁宗間之惻然自此殿試不黜落雖犯亦收之末名為定法可以謂之仁矣

兄弟同登

曾鞏子固嘉祐二年歐陽永叔知貢舉子固兄弟四人

同登科

鼠銜試卷

杜鎬龍圖江南名士植之祖也初登第時將試前夕見  
大鼠銜卷於前追之乃孝經正義明日果於正義中出  
題三道

夢中改名

孫夢得初名貫字道卿嘗語予曰某舉進士過長安夢  
登塔見持一大文卷者問之云來年春榜索而視之不

可問其間有孫貫否曰無惟第三人有孫抃既寤遂改

名抃明年果然

東齋記事

貴游覆試

王祐知舉陶穀子邴登第上曰穀不能訓子邴安得登第遽命中書覆試因詔自今舉人凡關食祿之家皆令

覆試

國史

貴游擢第

故事進士唱名宰執從官侍立左右有子弟與選者唱

名之次必降階稱謝縉紳間頗以為榮建炎初車駕在揚州會放進士時楊中立龍圖以侍讀侍立而其子適以特奏名預唱名中立亦降階稱謝時適之年已五十餘中立七十餘矣前此所無也

自取儒科

李宗諤昉之子七歲能屬文耻以父任得官獨由鄉舉既第進士授校書郎

再擢科第

元厚之舉進士擢高等殿試被黜復舉進士中第

廷對賜燭

舊例廷試舉人至暮者許賜燭然殿深易黑日昃則殿上燭出矣慶元五年上初策士江西正奏名進士黃寔嚴州特奏名進士皇甫鑑納卷最後廉州特奏名進士劉嘉猷賜燭至一更四點御藥院言故事賜燭正奏名降一甲特奏名降一等

朝野雜記

奏文星暗

以下係下第

唐大中間天官奏云文星暗科場當有事後經三科盡覆試復落考官皆罰俸

朝野僉載

失韻坦率

宋齊老於場屋舉止可笑嘗試賦輒失官韻乃拊膺曰宋五又坦率矣由是大著名後禮部上甲乙名德宗先問曰宋五得無坦率否

一生無成

馮藻應二十五舉姻親勸令罷舉求官藻曰譬

音匹如一

生無成更應五舉

北夢  
瑣言

失無愠色

黃魯直得洪州解頭赴省試與侯希聖數人待榜相傳  
魯直為省元同舍置酒有僕自門被髮大呼而入舉三  
指問之乃同舍三人魯直不與坐上數人皆散去至有  
流涕者魯直飲酒自若飲罷者榜不少見於顏色

孫公  
談圃

古今文集

雜著

送班孝廉擢第歸東川覲省序

柳宗元

隴西辛殆庶猥稱吾文宜叙事晨持縑素以班孝廉之  
行為請且曰夫人殆所謂吉士也愿而信質而禮世其  
家業研精墳典屬者舉春官獲居其甲焉家于蜀之東  
道其嚴君以客卿之位贊是方岳為大夫良今將拜慶  
寧觀光耀族屬是其可歌也道出于南鄭外王父以將  
相之重九命赤社為諸侯師今又將亟駕省謁從容燕

喜是又可歌也故某等若干人皆歌之矣若乃序者固  
吾子宜之柳子曰吾嘗讀王命論及漢書嘉其立言彼  
生彪固之胄歟相國馮翊公功在社稷德在生人其門  
子遊文章之府者吾嘗與之齒彼生嚴氏之出歟承世  
家之儒風沐外族之休光彼生專聖人之書而趨君子  
之林宜矣哉遂如辛氏之談濡翰于素因寓于辭曰為  
我謝子之舅氏珠玉將至得無修容乎

送陳自然西上序

馬子才

朔風驚沙枯梢號寒子行亦良苦聞之京師曰米如買  
珠薪如束桂膏肉如玉酒樓如登天驟雨至矣黑潦滿  
道則馬如游龍清霜激風客衣無襦袍膝而告調則火  
如紅金子之游京師所以待此具者其挾幾何豈子之  
家位高金多父母兄弟渠渠款款厚撫以遺子乎曰無  
有也豈子之隣里鄉黨相悅以義出門辭東家而西家  
待贐矣寧有是乎曰無有也豈子之昵親挾友入室握  
手說無說有把酒相別飲酣氣張有解劍而指廩者乎

曰無有也然則子之此遊挾何術以往曰吾視囊中不見其有物視吾胷中耿耿者尚在也以吾之耿耿者遊天地間庶幾必有合乎予聞其言而壯之曰今人適百里必宿春而漸乃敢出門戶今子有數千里之役徒手以往浩然無憂予固驚怪子矣果如子言予來春於江南林石之下間北方有焰焰者必子也夫

新進士期集

新及第進士舊以名次高下率錢期集貧者或稱貸於

人祐陵間之熙寧六年始賜新進士錢三千緡為期集費自余中始也渡江後賜千七百緡自是遂為故事新舊進士入謝進謝恩銀百兩熙寧六年亦罷之今新進士期集所號為團司置局於禮部貢院釋褐日即付上三人主之其職事有糾彈牋表主管題名小錄掌儀典客掌計掌器掌膳掌酒菓監門等多或至百餘人仍具所差姓名申禮部御史臺照會後旬日朝謝又數日拜黃甲叙同年于禮部貢院其儀三名設褥于堂上東西

相向同年四十已上立于東廊四十已下立西廊皆再拜拜已擇榜中年長一人狀元拜之復擇最少者一人拜狀元又數日赴國子監謁謝先師鄒國公用釋菜禮三名為三獻榜中有士望者一人為監禮官已謝賜聞喜宴于禮部貢院侍從以上及館職皆與知舉官押宴已宴立題名石刻乃罷局馬大凡團司主狀頭授誥出

國門乃罷

朝野雜記

# 古詩

寄崔立之

韓愈

西城員外丞心跡兩崛竒往歲戰詞賦不將勢力隨下  
驢入省門左右驚分披傲兀坐試席深叢見孤羅文如  
翻水成初不用意為四座各低回不敢捩眼窺升階揖  
侍郎歸舍日未歛佳句喧衆口考官敢瑕疵連年收科  
第若摘領底髭回首卿相位通途無他岐豈論校書郎  
袍笏光參差童稚見稱說祝身得如斯儕輩妒且熱喘  
如竹筒吹老婦願嫁女不約論財資老翁不量分累月

答其兒攪攪爭附託無人角雄雌由來人間事翻覆不  
可知安有巢中鷲插翅飛天陸駒羸著爪牙猛虎偕與  
皮汝頭有韁繫汝脚有索縻陷身泥溝間誰復稟指撝  
不脫吏部選可見偶與奇又作朝士貶得非命所施憐  
我還好古官途同險巇君看一時人幾輩先騰馳過半  
黑頭死陰蟲食枯骴歡華不滿眼咎責塞兩儀夫子固  
吾黨新恩釋銜羈去來伊洛上相待安眾單我有雙飲  
殘其銀得朱提黃金塗物象雕鐫妙工倕乃令千里鯨

么麼微螽斯猶能爭明月擺掉出渺瀰野草花葉細不  
辨薺菜施綿綿相糾結狀似環城牌四隅芙蓉樹擢艷  
皆猗猗鯨以興居狀失所逢百罹月以喻夫道儼俛勵  
莫虧草木明覆載妍臭齊榮萎願君常御之行止親遂  
鵬異日期對舉當如合分支

律詩

上禮部陳侍郎

施肩吾

九重城裏無親識八百人中獨姓施  
弱羽飛時攢箭險

蹇驢行處薄冰危  
晴天欲照盆難及  
貧女如花鏡不知  
却向從來受恩地  
再求青律變寒枝

崇政殿放榜

蔡持正

黃帕開封出奏篇  
銀袍二百玉階前  
威顏咫尺瞻中宸  
名姓傳呼下九天  
宮筆旋題黃甲字  
禁門已簇杏花韉  
孤臣拜賜交悲喜  
相望先分五十年

送蜀人張師厚赴殿試

蘇子瞻

雲龍山下試春衣  
放鶴亭前送夕暉  
一色杏花三十里

新郎君去馬如飛

重送胡大夫赴振武

武舉

楊巨源

何年擢桂儒生業今日分茅聖主恩  
旌旆仍將遇鄉路軒車爭出看都門  
人間文武能雙捷天下安危待一論  
布惠宣威大夫事不妨詩思許琴樽

詩話

謁光範門

新進士放榜後翼日排光範門候過宰相雖云排光範

門其實建福門集於四方館者昔有詩曰華陽觀裏鐘聲集建福門前鼓動時即其事也

移樂泛舟

唐進士開宴曲江亭既撤饌則移樂泛舟又有燈閣打毬之會故東坡有曲江船舫月燈毬之句

瘦馬番羶

唐太和八年放進士多賔士無名子作詩曰乞兒還有大通年六十三人籠仗全薛庶準前騎瘦馬范鄴依舊

蓋番糧

秦中記

丹桂五枝

竇禹鈞有子五人儀儼侃僖俱登科馮道贈之詩曰  
靈椿一株老丹桂五枝芳

命妓開宴

楊汝士尚書鎮東川其子及第汝士開宴營妓咸集汝  
士命人與綾一端詩曰郎君得意正青春蜀國將軍又  
不負一曲高歌綾一疋兩頭娘子拜夫人

喜子登科

張師錫侍郎年八十有喜子登第詩曰御史今朝至見  
名心始安爾能俱中第吾可遂休官賀客流連飲家書  
反覆看世科雖不繼得慰二親難

擇壻車

唐進士開宴常寄曲江亭其日公卿家縱觀鈿車珠鞅  
櫛比而至中東牀者十八九故坡詩云囊空不辦尋春  
馬眼眩行看擇壻車

換却舊衣

張籍送李餘及第詩歸去惟將新誥牒後來爭取舊衣裳又知新進士以衣與人

登第放縱

杜牧之登科後三年放縱為詩曰落魄江湖載酒行楚腰纖細箇中情十年一覺揚州夢贏得青樓薄倖名

少年登第

樂天登第詩云慈恩塔下題名處十七人中最少年時

年二十七

兄弟繼登

樂天與弟敏中行簡三人相繼皆中第樂天作詩云自  
憐郡姓為儒少豈料詞場中第頻桂折一枝先語我楊

穿三葉盡驚人

漁隱

師生窮達

李頻方干高弟也登第後干寄詩曰弟子已攀桂先生  
猶卧雲

皆取寒素

元和十二載李源公榜三十三人皆取寒素時有詩曰  
元和天子丙申年三十三人同得仙袍似爛銀衣似錦  
相將白日上青天

郡守餞送

盧肇黃顓皆宜春人同舉郡守獨餞顓明年肇狀元及  
第歸郡守會肇觀競渡肇即席作詩云報道是龍人不  
信果然奪得錦標歸太守大慚

獻主司詩

孟賓于獻主司詩那堪雨後更鳴蟬溪隔重湖路七千  
憶昔故園楊柳岸全家送上渡頭船主司得詩自謂得

賓于之晚

雅言  
系述

賜進士詩

太宗好文進士及第賜間喜宴常作詩贈之景祐間因  
以為故事仁宗在位四十二年賜詩尤多不必盡上所  
作景祐年賜詩落句云寒儒逢景運報德合如何論者

謂質厚宏壯真詔旨也

有父詩話

破天荒

唐荊州每解舉人多不成名號曰天荒至劉蛻舍人以荊州解及第曰破天荒東坡嘗以二句贈瓊州進士姜唐佐云滄海何曾斷地脉白袍端合破天荒用此事也姜唐佐過許昌見潁濱時東坡已下世相持出涕潁濱為題其後云待子及第當續後句復足成其詩云生長茅間有異芳風流稷下古諸姜適從瓊管魚龍窟秀出

羊城翰墨場云云錦衣他日千人看始信東坡眼目長

錦織御詩

李廷臣官於瓊管有一夷人獻錦臂條上織成一聯云  
恩袍藍色動仙籍桂香浮乃仁宗朝賜進士及第人詩  
也廷臣以千金易之藏為珍寶

青瑣

紅裙爭看

舒王有詩云却憶金明池上路紅裙爭看綠衣郎歐公  
謂舒王曰謹愿者亦復為之耶

止壓一人

周師厚在鄭獬榜及第只壓得陳傳自賦云云有眼不堪看鄭獬回頭猶喜得陳傳

詩戲壓榜

紹興丙午正奏名第一人王十朋特奏名第一人李三錫時宗室子居覩榜尾不樂或以詩戲之曰舉頭雖不窺王十仲脚猶能踏李三

律詩

以下係  
下第

下第集句

石曼卿

一生不得文章力，欲上青天未有因。  
聖主不勞千里召，嫦娥何惜一枝春。  
鳳凰詔下須沾命，豺虎叢中也立身。  
啼得血流無著處，朱衣騎馬是何人。

西清詩話

與潘三失解後飲酒

蘇子瞻

千金敝帚誰人買，半額娥眉世所妍。  
顧我自為都眊眊，憐君欲闔小嬋娟。  
青雲豈易量他日，黃菊猶應似去年。  
醉裏未知誰得喪，滿江風月不論錢。

詩話

以下係  
下第

賺了英雄

唐制進士科甚重其老死文場者亦無限故有詩云太

宗皇帝真長策賺得英雄盡白頭

國史補

下第獻詩

唐元和中士人下第多為詩刺試官獨章孝標作歸燕  
詩獻庾承宣侍郎曰積累危巢泥已落今年故向社前  
歸連雲大厦無棲處更傍誰家門戶飛

東野下第

孟東野下第詩曰棄置復棄置情如刀劍傷又再下第  
詩曰兩度長安陌空將淚見花其後登第詩曰昔日齷  
齪不足嗟今朝曠蕩恩無涯春風得意馬蹄疾一日看  
盡長安花進取得失蓋亦常事而東野器宇不宏偶下  
第則情隕獲如刀劍傷以至下淚既登科則志意充溢  
一日之間花則看盡何其速耶後授溧陽尉卒

唐宋遺史

在孫山外

孫山應舉綴名榜末朋儕以書問山得失荅曰解名盡處是孫山餘人更在孫山外覽者大笑

特科

晚成附

羣書要語大器晚成

老子

詩句紫綬映晚年

杜

古人多重晚年榮

杜荀鶴

古今事實

老而仕

絳縣人七十有三年矣趙孟仕之使為君復陶

主衣服之官

以為絳縣師

左襄

八十司徒

鄭武公年過八十入為周司徒

六十始仕

公孫弘年六十以賢良徵為博士至宰相封侯

八十召拜

武帝東帛加璧安車駟馬迎申公時年已八十餘矣天

子以為中大夫

儒林

大才晚成

馬援兄況謂援曰汝大才當晚成

本傳

頭白補郎

漢獻帝詔曰今耆儒年踰六十去離本土結童入學白首空歸長委農野永絕榮望朕甚憫焉其依科罷者聽為太子舍人時長安中為之謠曰頭白皓然食不充糧裹衣寒裳當還故鄉聖主愍念悉用補郎舍是布衣被服玄黃

七十而召

張柬之以賢良召時年七十餘矣狄仁傑薦曰荊州長史張柬之雖老宰相才也姚崇又薦曰其人老唯亟用之即日召拜平章事年已八十

立推恩法

至和間富公當國立一舉三十年推恩之法蓋公與河南進士段希元魏升平同場屋相善公作相不欲私之故為天下之制

間見錄

晚得官瓊林頓覺酒腸寬  
平康夜過無人問留得宮花

醒後者

錄侯鯖

古今事文類聚前集卷二十七